

इवनिंग डोगरी न्यूज़ बुलेटिन

समे .18:15 Hrs

एह आकाशवाणी जम्मू ऐ, संजा खबरें च तुंदा सुआगत, पैहलें खास-खास खबरें कन्नै में जगमोहन शर्मा।

<><><><><><>

Headlines

- 1 औंदे लोकसभा चुनाएं च बक्ख-बक्ख मरहलें दौरान सुरक्षा दे मददेनजर जम्मू-कश्मीर केंद्र शासित प्रदेश च राजौरी-पुंछ दे कन्नै-कन्नै पूरी कश्मीर घाटी च जम्मू-कश्मीर पुलस दे अलावा केंद्री सशस्त्र पुलस बल बी तैनात कीते जाडन।
- 2 उप-राज्यपाल मनोज सिन्हा होरें आखेआ ऐ जे 21मीं सदी च नौजवानें दे नमें-नमें विचार राष्ट्र दी संपदा होडन ते यूनिवर्सिटिएं ते कालजें दी भूमिका दा होर विस्तार होग।
- 3 लोकसभा चुनाएं दे पैहले मरहले दी अधिसूचना कल जारी कीती जाग।
- 4 सीमा सुरक्षा बल दे स्पेशल डरैक्टर जनरल वाई.बी खुरानिया होरें कुपवाड़ा जिले च कब्जा रेखा दे अगेत्रे इलाकें दा दौरा लाया ते सुरक्षा त्यारियें दा जायज़ा लैता।

<><><><><><>

ते हुन खबरें दी तफसील कन्नै निर्मल विक्रम।

<><><><><><>

CAPF

जम्मू-कश्मीर केंद्र शासित प्रदेश च 19 अप्रैल थमां 5एं मरहलें च शुरू होने आले लोकसभा चुनाएं गी रमानदारी आले ढंग्गै सिर कराने लेई प्रशासन आस्सेआ केंद्री सशस्त्र पुलस बल दे अलावा बक्ख बटालियन दे पुलस बल गी बी तैनात कीता जाग। आकाशवाणी जम्मू दे संवाददाता नै दस्सेआ जे बाद्दू केंद्री पुलस बल गी जम्मू खित्ते दे दौनें जिलें राजौरी ते पुंछ दे कन्नै-कन्नै पूरी कश्मीर घाटी च तैनात कीता जाग तां जे चुनाएं दौरान सियासी माहौल गी खराब नी कीता जा ते कुसै किस्मै दा आतंकी हमला अंजाम नेई दिता जा। जम्मू-कश्मीर पुलस आस्सेआ जम्मू-कश्मीर सशस्त्र पुलस दियां अपनियां रिजव बटालियनां ते भारती रिजव पुलस गी आतंक निरोधी

अभियानें लेई सुरक्षा दे मद्देनजर चुनावें दौरान तैनात कीता जाग। भारती चुनावें आयोग नै अर्ध सैनिक बलें दियें 635 कंपनियें गी जम्मू-कश्मीर च तैनात करने दी मंजूरी पैहले गै देई दिती दी ऐ। इंदे चा 36 कंपनियें गी ई.वी.एम दी सुरक्षा लेई स्ट्रांग रूमस दे बाहर ते वोटें दी गिनतरी दौरान केंद्रें दे बाहर खड़ेरया जाग।

<><><><><><>

LG-Goonj

उपराज्यपाल मनोज सिन्हा होरें अज्ज जम्मू यूनिवर्सिटी च आयोजित दो रोजा युवा उत्सव गूज 2024 दा उद्घाटन कीता। उद्घाटनी भाषण च बोलदे होई श्री सिन्हा होरें आखेआ जे 21मीं सदी च नौजवानें दे नमें-नमें विचार राष्ट्र दी सम्पत्ति होडन ते यूनिवर्सिटीं ते कालजें दी भूमिका दा होर विस्तार होग। उनें आखेआ जे इस कार्यक्रम दा मकसद विद्यार्थियें गी अपनी रचनात्मकता ते प्रतिभा गी दर्शाने ते दिक्खने आला शानदार माहौल देने लेई इक मंच प्रदान करना ऐ। उपराज्यपाल होरें आखेआ जे यूनिवर्सिटी दे कैम्पस गी आपूं चें दे सहयोग ते तब्दीली आनने आलें आस्तै प्रेरणा देने आलें दे तौर पर जानेया जाना चाहिदा। उनें आखेआ जे शिक्षण संस्थानें दी भविक्ख च सार्थकता आस्तै अध्यापकें गी विद्यार्थियें दे अंदर छप्पी दी प्रतिभा ते हुनर गी बाहर आनना चाहिदा ते उंदी भावना पवित्तर ते स्वतंत्र सोच आली बनानी चाहिदी। उनें अग्गे आखेआ जे शिक्षा गी नमीं-नमीं काड्डें, विचारें, खोज ते नवाचार लेई प्रेरणा देने आला होना लोडचदा।

<><><><><><>

MCC-Samba

ओंदे लोकसभा चुनावें दे मद्देनजर साम्बा जिले च अज्ज जिला मुख्यालय च चुनावें अमले गी सिखलाई देने लेई जिला प्रशासन आस्सेआ इक विशेष कार्यक्रम दा आयोजन कीता गेआ। इस दौरान उनेंगी ई.वी.एम दे इस्तेमाल, रख-रखाव, सील करने बारे जानकारी ते सिखलाई दिती गई। स्हाड़े जिला संवाददाता सतपाल शर्मा कन्नै गल्ल करदे होई जिला चुनावें अफसर अभिषेक शर्मा होरें दस्सेआ।

<><><><><><>

DEO-Doda

इयां गै औंदे चुनाएं दे मददेनजर डोडा जिले च वीडियो राएं तक्क रक्खने ते वीडियो दिक्खने लेई बनाई गेदिएं टीमें जिला चुना प्राधिकरण गी रोजमर्ग दिएं गतिविधिएं बारै जानकारी देना शुरू करी दिते दा ऐ। मता ध्यान शराब, नशीले पदार्थ ते पैहें दे लैन-देन सरबंधि गतिविधिएं बक्खी दिता जा'रदा ऐ। जिला चुनां अफसर हरविंद्र सिंह होरें दस्सेआ जे जिले दिएं सबनें त्र'ऊं विधानसभा हल्के हेठ पौंदे इलाके च कुल 529 मतदान केंद्र बनाए जाडन जित्थे वोट पाने लेई योग्य मतदाताएं दी गिनतरी 3 लक्ख 4 जहार 311 ऐ। उनें आखेआ.....

<><><><><><>

Cooperative Ramban

रामबन जिले च सहकारिता विभाग लोके दे इक खुदमुख्तयार संगठन दे रूपै च लोके दिएं सांझिं आर्थिक, समाजी ते सांस्कृतिक जरूरतें ते तांगें गी पूरा करने लेई कम करा'रदा ऐ। मैहकमे नै केंद्र आस्सेआ प्रायोजित सांझी दोआर स्कीम गी बी लागू कीता ऐ जेदे राएं करसान तबके गी मता फैयदा पुजाया जा'रदा ऐ। स्हाड़े जिला संवाददाता अजय दीप सिंह कन्नै गल्ल करदे होई डिप्टी रजिस्ट्रार प्रियंका शर्मा होरें दस्सेआ।

<><><><><><>

NDA-Alliance

केंद्री मंत्री ते राश्ट्री लोक जनशक्ति पार्टी दे प्रमुख पशुपति कुमार पारस होरें अज्ज केंद्री मंत्रीमंडल थमां इस्तीफा देई दिता ऐ। इयां लोकसभा चुनाएं लेई बिहार च एनडीए दे सीटें दी बंड आले समझौते दे बाद होआ ऐ जेदे च पशुपति कुमार पारस हुंदी पार्टी गी चुना लड़ने लेई कोई सीट नैई दिती गई ही। अज्ज नमीं दिल्ली च मीडिया कन्नै गल्ल करदे होई पारस होरें ऐलान कीता जे उंदी पार्टी कन्नै कथित तौरा पर बेन्यायी कीते जाने करी ओह इस्तीफा देआ करदे न।

<><><><><><>

ते हुन बाकी दिएं खबरें कन्नै जगमोहन शर्मा।

LS-Poll-Notification

लोकसभा चुना दे पैहले गेड़ दे मतदान लेई अधिसूचना कल जारी कीती जाग जेदे तैहत 17 राज्यें ते 4 केंद्र शासित प्रदेशें च 102 लोकसभा सीटें लेई 19 अप्रैल गी वोट पोआए जाडन। इनें 102 सीटें चा 39 तमिल नाडू, 12 राजस्थान, 8 उत्तर प्रदेश, 6 मध्य प्रदेश, 5-5 सीटां उत्तराखंड, असम ते महाराश्ट्र च, 4 बिहार, 3 पच्छिम

बंगाल, अरुणाचल प्रदेश, मणिपुर ते मेघालय च 2-2 ते 1-1 सीट छतीसगढ़, मिजोरम, नागालैंड, सिक्कम, त्रिपुरा, अंडमान-निकोबार, जम्मू-कश्मीर, लक्षद्वीप ते पुदुचेरी च न। 2024 दे लोकसभा चुनांs च कुल 7 गेड़ें च करोआए जा करदे न। वोटें दी गिनतरी 4 जून गी कीती जाग।

<><><><><><>

SDG-LOC

लोकसभा चुनाएं दी घोषणा दे बाद समूलचे जम्मू-कश्मीर च बी सुरक्षा त्पारिएं ते बन्ने कन्ने लगदे इलाकें दी सुरक्षा स्थिति बक्खी चेचा ध्यान दिता जा करदा ऐ। चंडीगढ़ च सीमा सुरक्षा बल बीएसएफ दी पच्छमी कमान दे विशेष महानिदेशक वाई.बी खुरानिया होंरें इस्से सिलसिले च उत्तरी कश्मीर दे कुपवाड़ा जिले च नियंत्रण रेखा कन्ने लगदे अगेत्रें इलाकें दा दौरा लाया ते उत्थे सुरक्षा बंदोबस्तें ते कारवाइएं सरबंधि त्पारिएं दी समीक्षा कीती। समूलचे जम्मू-कश्मीर च नियंत्रण रेखा कन्ने लगदे इलाकें च सतर्कता बधाई दिती गेदी ऐ। बन्ने पारा घुसपैठ गी रोकने लेई बी बलें गी मता सौहगा सतर्क रौहने लेई आखेआ गेआ ऐ। एहदे अलावा प्हाड़ी दरें पर बर्फ बी पिघलना शुरू होई चुकी दी ऐ जेदे चलदे उआं बी घुसपैठ दिएं कोशिशें च तेजी दिक्खी जंदी ऐ। अधिकारिएं जानकारी दिती ऐ जे डी.जी होंरें उत्थे त्पारिएं दा जायजा लैने दे कन्नो-कन्नी उत्थे तैनात बलें कन्ने गल्लबात बी कीती।

<><><><><><>

GoC-Visit

फौज दी व्हाइट नाइट कोर दे जी.ओ.सी लेफ्टिनेंट जनरल नवीन सचदेव होंरें जम्मू जिले दे बन्ने कन्ने लगदे पलांवाला दे अगेत्रे इलाके दा दौरा लाया ते उत्थे सुरक्षा ते कारवाइएं सरबंधि त्पारिएं दा जायजा लैता। इस दौरान उनें उत्थे तैनात बलें कन्ने गल्लबात कीती ते उंदी निष्ठा, दलेरी ते पेशेवराना सलाहियत दी सराहना कीती।

<><><><><><>

Poonch Tulip Garden

पुंछ जिले च कृष्ण चंद्र पार्क च कोई 2 किलोमीटर दे रकबे च फैले दा टयूलिप गार्डन जेड़ा राजौरी ते पुंछ जिले दे लोकें लेई आकर्षण दा केंद्र ऐ, गी जिला विकास कमिशनर यासिन मोहम्मद चौधरी होंरें अज्ज सैलानिएं ते मकामी

लोकें लेई खुल्ला घोषित करी दिता। स्हाड़े जिला संवाददाता अनुभव मिसरी कन्नै इस बारै गल्ल करदे होई डी.सी होंरें आखेआ।

<><><><><><>

Start up Mahakumb

कल्लै थमां भारत महामंडपम नमीं दिल्ली च शुरू होए दा स्टार्ट अप महाकुम्भ, इक छतै हेठ, भारत दे शानदार स्टार्ट अप माहौल गी इक जुट करने दी प्रक्रिया दी शुरूआत ऐ। भारत नवप्रवर्तन विशे उप्पर आधारित इस कार्यक्रम दा मकसद नमें-नमें स्टार्ट अप्स, निवेशकें ते उद्योग जगत दे उद्यमियें आस्तै मौके प्रदान करने दे अलावा नमिएं खोजें, काड्डें ते नेटवर्किंग गी विकास आस्तै रफ्तार देना ऐ।

<><><><><><>

IAF-Sport person

भारत वायु सेना आस्सेआ अज्ज क्रिकेट खडारी पुलकित नारंग, मोहम्मद नूरहसन ते हिमांशु गी राश्ट्री ते अंतरराश्ट्री सतह उप्पर बेहतरीन प्रदर्शन आस्तै 19 होर दुए खडारियें कन्नै सम्मानित कीता गेआ। भारत दे वायु सेना अध्यक्ष वी.आर चौधरी होंरें नमीं दिल्ली च आयोजित इक समारोह च वायु सेना कन्नै जुड़े दे इनें सब्बनें खडारियें गी सम्मानित कीता। मौके उप्पर बोलदे होई वायु सेना अध्यक्ष होंरें वायु सेना दे इनें जुआनें दी खड्डें च शानदार उपलब्धियां हासिल करने लेई सराहना कीती। सार्जेंट पुलकित नारंग नै 2022-2023 च भारत दी अंतरराश्ट्री सतह उप्पर नुमायंदगी कीती ही ते सार्जेंट मोहम्मद नूर हसन ते एल.ए.सी हिमांशु गी नेशनल ओपन एथलेटिक्स चैंपियनशिप 2023 च सुन्ने दे तगमे जितने लेई सम्मानित कीता गेआ हा।

<><><><><><>

PM-Kerala Road Show

प्रधानमंत्री ते बीजेपी दे सीनियर लीडर नरेंद्र मोदी होंरें अज्ज एनडीए चुना अभियान दे इक्क हिस्से दे तौरा पर केरल दे पलक्कड़ च इक रोड शो च हिस्सा लैता। आम चुनावें दी घोषणा दे बाद मोदी हुंदा केरल च एह पैहला अभियान समारोह हा। बीजेपी दे केरल दे प्रधान के. सुरेंद्रन ते पलक्कड़ ते पोन्नानी लोकसभा सीटें थमां एनडीए दे मेदवार बी प्रधानमंत्री हुंदे कन्नै इक खुल्ले छत आहली गड्डी पर सोआर होइए रोड शो च शामिल होए।



News Read By : Nirmal Vikram and Jagmohan Sharma

Composed by : Varinder Sharma

Skilled : Tarsem Lal

Editor : Ashok Kumar Mota
